

Govor mr.sci. Muhdina Mujačića, direktora Visoke škole računarstva i poslovnih komunikacija eMPIRICA u Brčko distriktu BiH, tokom Svečanog akademskog časa za bruce, 8. oktobar 2012. godine

- Uvaženi gosti,
kolege studenti,
nastavnici i saradnici,
- Pozdravljam vas i želim vam dobrodošlicu na Visoku školu računarstva i poslovnih komunikacija eMPIRICA. Početak akademske godine poseban je događaj za sve koji pohađaju ili izvode nastavu, naročito kada se ima u vidu da u ovoj 2012./2013. akademskoj godini Visoka škola računarstva i poslovnih komunikacija eMPIRICA i ja, kao direktor ove Visoke škole, imamo čast pozdraviti prvu generaciju studenata – bruce ove visokoškolske ustanove.
- Ovo je veliki dan za sve nas, jer danas počinje realizacija naših planova i ideja, ali i velikih obaveza koje na sebe preuzimamo kada je u pitanju pružanje visokokvalitetnog obrazovanja našim budućim studentima. Uz čvrstu odlučnost obavezujemo se da ćemo ih učiniti istinskim stručnjacima, dobrim zaposlenicima, poželjnim saradnicima, odgovornim građanima.
- Osnivanje ove Visoke škole postalo je nužnost, ne samo da bi se nastavio razvoj visokog obrazovanja, nego i da bi se osigurao dalji ekonomski, društveni i kulturni preobražaj ovog regiona. Pojava prvih škola u ovoj regiji počela je u prvoj polovini 19. vijeka, u početku sa izrazito vjerskim obilježjem, a kasnije i sa svjetovnom orijentacijom. U Brčkom je 1883. godine osnovana i počela sa radom Trgovačka škola. Mnogo vremena kasnije, 1960. godine osnovana je Viša ekonomsko-komercijalna škola, sa odjeljenjem u Tuzli, koja je 1976. godine prerasla u Ekonomski fakultet.
- Do prošle godine, Ekonomski fakultet u Brčkom je predstavljao jedinu opciju za studiranje u ovom gradu. No, na prijelazu u novi milenijum, obrazovanje u BiH se našlo pred izazovom definisanja svoje misije, vizije i strategije razvoja, okrenuto evropskim integracijskim i globalizacijskim procesima. Kako u globalizacijskim procesima IT industrija zauzima značajno mjesto, ne iznenađuje činjenica da su stručnjaci u tom polju izrazito traženi na tržištima rada širom svijeta. Stoga i Visoka škola eMPIRICA svoje glavno opredjeljenje bazira na obrazovanju kvalitetnog IT kadra spremnog da se suoči sa izazovima u

praksi, što predstavlja segment obrazovanja koji je do sada bio nedovoljno razvijen na prostoru BiH.

- Želim vas podsjetiti da je Odjeljenje za obrazovanje Vlade Brčko distrikta dana 05.01.2012. godine izdalo Rješenje o ispunjenosti uslova za osnivanje i početak rada visokoškolske ustanove za Visoku školu računarstva i poslovnih komunikacija eMPIRICA u Brčko distriktu BiH – licencu, odnosno prvu akreditaciju. S ponosom ističemo da smo jedina visokoškolska ustanova u Brčko distriktu kojoj je odobrena безусловna licenca, što samo dokazuje sa kakvim stepenom ozbiljnosti i posvećenosti smo pristupili osnivanju ove Visoke škole.
- Koristim priliku da napomenem da je Visoka škola računarstva i poslovnih komunikacija eMPIRICA u Brčko distriktu BiH zajednički poslovni poduhvat Fondacije za lokalne poslovne inicijative Brčko distrikt i Visoke škole za poslovne vede iz Ljubljane. Visoka škola eMPIRICA je utemeljena na principima Bolonjskog procesa, kvalitetnih studijskih programa koji podržavaju razvoj studentskih znanja, vještina i kompetencija, te upotrebi naprednih tehnologija kao podrške e-učenju.
- Kao što već i sami znate, Visoka škola eMPIRICA nudi dva studijska programa: Inženjerska informatika i Poslovna informatika. Ono po čemu se izdvajamo od ostalih jesu vrijednosti koje ćemo implementirati tokom visokoobrazovnog procesa, kao što su sticanje istinskih stručnih i praktičnih informatičkih znanja, te stručno profilisanje svakog studenta, kako bi nakon završetka studija bio osposobljen za zapošljavanje i samostalan rad na projektovanju, uspostavi i upotrebi informacijskih mreža i sistema, što je vrlo deficitaran profil u cijeloj regiji.
- Svečana promocija Visoke škole računarstva i poslovnih komunikacija eMPIRICA u Brčko distriktu BiH održana je 25.01.2012. godine u ovim prostorijama, i svečanosti su prisustvovala brojne zvanice iz obrazovnog, političkog, privrednog i kulturnog života Brčko distrikta i šire regije. No, nismo dugo slavili. Vrlo brzo smo se vratili marljivom radu da bi na vrijeme pripremili, kako upisne rokove, tako i sve što je potrebno za nesmetano odvijanje nastavnog procesa.
- U potpunosti je nabavljena laboratorijska oprema koju danas imate priliku vidjeti a tokom studija koristiti u nastavnom procesu, biblioteka

je opskrbljena sa naslovima iz syllabusa nastavnih predmeta, pripremljeni su nastavni materijali, a vrijedno i ambiciozno nastavno osoblje garantuje da Visoka škola eMPIRICA dočekuje akademsku 2012./2013. godinu u potpunosti spremna za uspješan početak i realizaciju svojih studijskih programa.

- Veliki broj naših upisanih studenata se opredijelio za studij na našoj školi zbog mogućnosti studiranja na daljinu, što predstavlja veliku pogodnost za zaposlene ali i studente koji žive u drugim gradovima, a koji žele da se doškoluju, unaprijede svoja znanja i steknu zvanje koje im je neophodno za obavljanje poslova u budućnosti. Ovakav način studiranja nudi ogromne mogućnosti, kao što su praćenje predavanja putem video linka, pristup virtuelnom obrazovnom prostoru na Internetu sa atraktivnim multimedijским sadržajima, te uštede u vremenu i novcu. Naše nastavno osoblje je, od osnivanja do danas, prošlo niz obuka da bi bili adekvatno osposobljeni za dizajniranje e-učionica, izradu e-materijala i ostalih sadržaja koji se nalaze na platformi e-Campus.
- Vas dragi bruceši, našu prvu generaciju studenata, dočekujemo dakle sa dodatno treniranim nastavnim osobljem za izvođenje tehnološki potpomognute nastave, pripremljenim multimedijским obrazovnim sadržajima za studij na daljinu, najmodernijom laboratorijskom opremom, u novim i moderno opremljenim učionicama.
- Pored stručnog osoblja i moderne opreme, Visoka škola eMPIRICA svojim studentima pruža i mogućnost dobijanja dvojne diplome na studijskom programu Poslovna informatika, te edukaciju za potrebe sticanja priznatih industrijskih certifikata – konkretno Cisco Networking Academy program u okviru studijskog programa Inženjerska informatika. No, za našu prvu generaciju studenata smo osmislili i posebne finansijske pogodnosti, u znak zahvalnosti što ste svoje obrazovanje povjerili nama.
- Naime, želim vas podsjetiti da studentima studijskog programa **Poslovna informatika** koji su odabrali opciju dvojne diplome Visoka škola eMPIRICA finansira troškove upisnine za dvojnu diplomu na Visokoj školi za poslovne vede iz Ljubljane, koji iznose **290 eura**. Studijski program Poslovna informatika na Visokoj školi eMPIRICA je jedini studij poslovne informatike u BiH koji studentima nudi dvojnu diplomu po završetku studija.

- Studentima studijskog programa **Inženjerska informatika** Visoka škola eMPIRICA finansira troškove edukacije u okviru lokalne Cisco akademije VS eMPIRICA koji iznose **2000 KM**. Studijski program Inženjerske informatike na Visokoj školi eMPIRICA je jedini inženjerski informatički studij u BiH koji studentima omogućava da u okviru studija, kroz odabrana četiri predmeta, pohađaju program Cisco akademije mrežnih tehnologija.
- Sve ove uslove i pogodnosti smo kreirali sa namjerom da što kvalitetnije ispunimo osnovne ciljeve Visoke škole eMPIRICA koji se sastoje u sljedećem: razvoj visokoprofiliranog i permanentnog obrazovanja, prilagođavanje nastavnih programa evropskim iskustvima i trendovima, razvoj sistema za osiguravanje kvaliteta, stvaranje novog partnerstva sa privredom/ekonomijom, vladom, nevladinim organizacijama, civilnim i kulturnim institucijama, zaživljavanje visokih standarda i kriterija u akademskom životu koji će eMPIRICU svrstati u konkurentne partnere u BiH i Evropi.
- Dragi studenti, treba nam i vaša pomoć u postizanju postavljenih ciljeva: prvenstveno tako što ćete vrijedno učiti i biti aktivni sudionik u nastavi kako bi vaša znatiželja i konstruktivne kritike bili dodatni impuls za vaše nastavnike. U osnovi vašeg učenja treba biti kontinuitet u radu i razumijevanje naučenog – **kontinuitet** kao preduslov pravilnog sticanja znanja i kao osnov urednog savladavanja nastavnog plana i programa te **razumijevanje naučenog** kao sastavni dio formiranja upotrebljivih vještina koje su djelotvornije od pukog memorisanja teoretske podloge.
- Za ostvarivanje naših zajedničkih ciljeva na usluzi su vam nastavno osoblje i zaposleni na našoj Visokoj školi, čija su vam vrata uvijek otvorena da zajedno rješavamo sva pitanja koja su za vas važna.
- Ovom prilikom vam, ispred Visoke škole računarstva i poslovnih komunikacija eMPIRICA, želim uspješno studiranje i ulazak u akademsku zajednicu. Učinimo sve da rad i rezultati ove Visoke škole budu vaš i naš ponos, da budu mjera naše akademske ozbiljnosti i vaše mladalačke upornosti i zalaganja.
- Hvala vam na pažnji, i želim vam svima uspješan studij, pregršt novostečenog znanja i upotrebljivih vještina.